

Per ils povers dal mund

In cardinal appellescha a la conscienza dals responsabels

DA GUIU SOBIELA-CAANITZ

■ **L'economist scozzais Adam Smith (1723–1790), bab dal liberalissem modern, era persvas ch'il «maun invisibel dal martgà» regleschia da sai or ils problems economics. Oz han ins fadia da crair quai. La crisa dals davos mais mussa ch'i vul intervenziuns statatalas.** Quant inavant? Quai è ina dumonda etica. En curt stuainsa u dasgainsa vuschar davart l'introducziun d'in rom obligatori «etica» en la scola grischuna. Quai schabegia al dretg mument, cur ch'i vegn cler ch'il neoliberalissem ha disditg per mancanza da senn etic. Quai savev'ins gia lignar 2002 cun il «grounding» da la Swissair.

Avant paucs dis hai vulì la sauna indignaziun da la cussegliera federala responsabla per trair endament ch'ils posts da directurs e manaders han autras finamiras che mo metter en salv bunificaziuns abundantas. En lez senn ha gist admonì cardinal Oscar Andrés Rodríguez Madariaga (Tegucigalpa/Honduras), anteriur parsura da la Conferenza episcopala da l'America latina (CEAL) ed oz parsura da la Caritas internaziunala. El è vegnì a Vienna per survegnir il premi deditgà a Viktor Frankl, creader da la logoterapia. Cun questa occasiun ha il radio austriac transmess in'intervista cun il cardinal en l'emissiun «Religion und Gesellschaft» il glindesdi da las nov a las diesch. Quai è stà ils 3 da november. Rodríguez valeva sco «papabile» tar il conclave da 2005; blers han deplorà ch'el n'è betg vegnì papa. El stat sin la lingua da ses confrar dal Salvador limitrof, arch-



Adam Smith.

vestg Oscar Arnulfo Romero y Galdámez (1917–1980), assassinà amez sia messa dals sbirs da la dittatura «salvadoreña». Las decleraziuns dal cardinal meritan l'attenziun da tgi che s'interessa per l'avegnir da la carstgaunadad.

«Una vergüenza»

Frankl punctuava che mintga uman duaja chattar or sez il senn da sia atgna vita. Tgi ch'auda cardinal Rodríguez chapescha svelt tge senn che lez, cun 65, dat als onns ch'el astga anc viver. Ses quità principal pertutga la misergia en il mund, cunzunt s'enclegia en l'America latina. El è commember da la Societad s. Francestg da Sales, fundada dal spiritual piemuntais s. Gion Bosco (1815–1888) per promover l'educaziun da la giuventetgna povra. Rodríguez cri-

titgescha cun vehemenza il svilup da l'economia globala en ils davos ventg onns e cunzunt l'irresponsabladad etica da ses manaders («una vergüenza» [«vergüenza»]); il «maun invisibel dal martgà» d'Adam Smith numna'l «il maun zuppà da laders». El manegia ch'ils «rubadurs d'oz dettian golf e portian vestgids sin mesira». L'Honduras (7 milliuns olmas) descriva'l sco in dals pajais ils pli povers dal mund, cun 1/5 analfabets, fugia da la champagna ed in'emigraziun media da 9 umans per ura. «Hondureños» dat-ti blers en ils Stadis unids; i han prestà lavur da strapatsch per reconstruir New Orleans suenter l'orcan «Charina». Las bandas da giuvens assassins dumbran almain 35 000 commembers. Las vivondas vegnan pli charas pervi dal svilup da l'energia biologica; cun l'ielì da palma da l'Honduras e cun la farina da pulenta da México fan ins ieli Diesel, uschè ch'ils Mexicans ston pajar dapli per lur «tortilla» naziunala. El sustegn l'idea d'in plan da svilup ecologic e global, in'ediziun nova dal Plan Marshall da 1947, tenor primminister Gordon Brown ed Al Gore, anteriur vicepresidente dals Stadis unids. Sco parsura da la CEAL ha'l gidà ad elavurar il document final da la sinoda d'Aparecida/Brasilia 2007. Il cardinal manegia che la Baselia catolica basegnia in spiert nov e duaja sa transfurmar en il senn dal davos concil. Lezza giada ha papa Gion XXIII (Angelo Giuseppe Roncalli, 1881–1963), cun ses clom: «Aprite le finestre!», vulì nettegiar il Vatican da la pulvra e dal fried da miffa. El era vegnì elegì ils 28 d'october 1958. Co statti oz, in mez tschientaner pli tard?